

欽定續通志



欽定續通志卷四百六十七

列傳

元二十一

阿珠 阿爾哈雅 姜衛 托克托呼

緯和爾

阿珠烏哩特氏都帥烏蘭哈達子也憲宗時從其父征西南夷所向摧陷至平大理克諸部降交趾無不在行世祖卽位留典宿衛中統三年從諸王征李璫有功拜征南都元帥治兵于汴至元元年略地兩淮攻取戰獲軍聲大振四年觀兵襄陽遂入南郡取僊人鐵城等柵軍還宋兵邀襄樊間阿珠乃自安陽灘濟江立虛寨誘敵斬首萬餘級初阿珠過襄陽駐馬虎頭山宿漢東白河口曰若築壘於此襄陽糧道可斷也五年築鹿門新城等堡繼又築臺漢水中與夾江堡相應自是宋兵援襄者不能進六年大霖雨漢水溢宋將夏貴范文虎相繼來援復分兵出入水岸林谷間阿珠謂諸將曰此張虛形不可與戰宜整舟師備新堡明日宋兵果趨新堡大破之遂治戰船分水軍築圍城以逼襄陽文虎復率舟師來救來興國又以兵百艘侵百丈山俱敗走之九年破樊城外郭增築重圍以逼之宋裨將張順張貴自上流入襄陽阿珠攻之順死貴僅得入城俄乘船東走阿珠追戰至櫃門關擒貴餘衆盡死是年加同平章事先是襄樊兩城漢水出其間宋兵植木江中聯以鐵鎖中設浮梁以通援兵樊恃此爲固至是阿珠以鋸斷木以斧斷鎖焚其橋襄兵不能援十年

按拔樊城及呂文煥出降原傳作九年十二月事誤今據世祖記及阿爾哈雅傳改正

遂拔樊城襄守將呂文煥懼而出降奉命略淮東抵揚州城下宋以千騎出戰阿珠設伏擒其騎將王都統十一年入覲奏請伐宋帝可其奏詔益兵十萬與丞相巴延參政阿爾哈雅等同伐宋進平章政事師次郢之鹽山得

俘民言宋沿江九郡精銳盡聚郢江東西兩城不若取黃家灣堡由東河口拖船入湖轉以下江爲便遂舍郢而
去行大澤中忽宋兵千騎突至時從騎纔數十人阿珠奮槊馳擊斬一百餘級生擒其將趙范二統制進攻沙洋
新城拔之前次復州守將翟貴迎降時夏貴扼江漢口兩岸備禦堅嚴阿珠用軍將馬福計回舟淪河口從陽羅
堡西沙燕口入江進攻陽羅堡不克乃謂巴延曰若分軍船之半循岸西上伺隙擣虛可以得志從之明日阿珠
遙見南岸沙洲衆趨之與宋將程鵬飛戰於中流鵬飛敗走卽抵沙洲步鬪又破之追至鄂東門而還夏貴聞
阿珠飛渡引兵先遁餘皆潰走遂拔陽羅堡巴延議師所向阿珠勸取鄂漢于是水陸並進漢陽鄂州相繼皆降
十二年黃蘄江州降阿珠率舟師趨安慶范文虎迎降繼下池州宋丞相賈似道擁重兵拒蕪湖遣宋京來請和
巴延商之阿珠阿珠曰今日惟當進兵事若有失罪歸於我師進次丁家洲與宋前鋒孫虎臣對陣夏貴以戰艦
橫互江中似道殿其後阿珠挺身登舟手持旄矢入敵陣諸軍繼進宋兵遂大潰世祖以宋重兵皆駐揚州臨
安以之爲重命阿珠分兵圍揚州進攻真州敗宋兵于珠金沙既抵揚州造戰具于瓜洲漕粟于真州樹柵以斷
其糧道宋都統姜才領步騎二萬夾河爲陣阿珠擊之堅不能却衆軍佯北才逐之遂奮而回擊才軍不能支擒
其副將張林斬首萬八千級宋兩淮鎮將張世傑孫虎臣以舟師萬艘駐焦山東每十船爲一舫聯以鐵鎖以示
必死阿珠選善射者千人載以巨艦分兩翼夾射阿珠居中合勢進擊繼以火矢燒其蓬櫓煙燄張天宋兵爭赴
水死後軍散走自是宋人不復能軍矣十月詔拜中書左丞相時諸軍進取臨安阿珠駐兵瓜洲以絕揚州之援
巴延遂平宋十三年夏貴舉淮西諸城來附阿珠謂諸將曰今宋已亡獨庭芝未下若絕其聲援塞彼糧道必東
走通泰乃柵揚之西北丁村以扼其餽運貯粟灣頭堡以備捍禦留屯新城以逼泰州又遣千戶巴延徹爾率甲

騎三百助灣頭兵勢且戒之曰庭芝水路既絕必從陸出宜謹備之六月姜才知高郵米運將至果夜犯丁村柵按通鑑云自夜達旦元兵多敗廣土元戰死事詳土元傳巴延徹爾來援所將皆阿珠牙下精兵旗幟畫雙赤月衆軍望而呼曰丞相來矣

宋軍識其旗皆遁才脫身走追殺幾盡李庭芝以朱煥守揚州挾姜才東走阿珠追襲殺步卒千人庭芝僅入泰

州遂築壘守之朱煥以揚州降泰州守將孫良臣宋史作孫良臣胡惟寧開北門納降執李庭芝姜才戮之申禁暴掠兩淮悉

平入見世祖於大明殿陳宋俘第功行賞實封泰興縣二千戶二十三年受命北伐叛王寶喇穆爾等明年凱旋

繼又西征至哈喇和卓以疾卒追封河南王

阿爾哈雅輝和爾人聰辨有膽略家貧常躬耕舍耒嘆曰大丈夫當立功朝廷何至效細民事賦畝乎去求其國

書讀之逾月又棄去事世祖于潛邸世祖卽位漸見擢用由左右司郎中進敕河南行省事至元五年命與元帥

阿珠劉整取襄陽又加參知政事始帝遣諸將命毋攻城但圍之以俟其自降乃築長圍以絕之宋兵入援者皆

敗去然城中糧儲多圍之五年終不下阿爾哈雅以爲宜先攻樊城樊城下則襄陽可不攻而得乃入奏報可會

有西域人伊斯瑪音獻新礮法以其人來軍中十年爲礮攻樊破之先是宋兵爲浮橋以通襄陽之援阿爾哈雅

發水軍焚其橋襄援不至城乃拔遂移攻具以向襄陽礮中譙樓聲如雷霆城中洶洶諸將多踰城降者劉整欲

立碎其城阿爾哈雅不許乃身至城下勸呂文煥降折矢爲誓文煥感而出降帝以文煥爲襄漢大都督阿爾哈

雅行荆湖等路樞密院事鎮襄陽阿爾哈雅奏曰襄陽旣克宜乘勝順流長驅宋可必平平章阿珠亦贊其說帝

乃大徵兵拜巴延爲行省左丞相阿珠爲平章阿爾哈雅進行省右丞十一年會師襄陽遂破郢州及沙洋新城

師出沙蕪口宋制置夏貴守諸隘甚固阿爾哈雅磨兵攻陽羅堡原作武磯堡今依巴延貴趨援之阿珠遂西渡

青山磯宋都統程鵬飛迎戰敗之江中會貴兵亦敗走廬州知鄂州張晏然以城降鵬飛以水軍降巴延與諸將會鄂城下遣阿爾哈雅戍鄂而與阿珠將大兵以東阿爾哈雅集鄂民宣上德惠禁將士毋侵掠民大悅遣人徇壽昌信陽德安諸郡皆下進徇江陵十二年與安撫高世傑兵遇于巴陵世傑敗走追降之遂下岳州至沙市城不下縱火攻之沙市立破宣撫朱禪孫制置高達以城降乃入江陵釋係囚放戍軍除其徭賦及法令之繁細者傳檄鄧歸峽常德澧陵辰沅靖復均房施荆門及諸洞無不降者盡奏官其所降官以兵守峽籍其戶口財賦來上帝喜曰巴延兵東阿爾哈雅以孤軍戍鄂朕甚憂之今荆南定東兵無後患矣親作手詔褒之命右丞廉希憲守江陵促阿爾哈雅還鄂且以沿江新附諸城委之阿爾哈雅至鄂招潭州守臣李芾不聽乃移兵長沙拔湘陰射書城中以示芾復不答乃決隍水部分諸將以礮攻之破其木堡流矢中胸創甚督戰益急十三年芾力屈及轉運使鍾蜚英都統陳義皆自殺其將劉孝忠以城降諸將欲屠之阿爾哈雅不可復發倉以食飢者遣使徇彬全道桂陽永衡武岡寶慶袁韶南雄諸郡其守臣皆率其民迎降曰聞丞相所過秋毫無犯民今復見太平矣宋經略使馬堅守靜江不下使總管俞全招之皆爲所殺會宋主以國降降手詔諭堅堅復殺之阿爾哈雅乃又爲書以開堅終不聽因入朝賀平宋拜平章政事使持詔如靜江諭堅焚之斬其使靜江以水爲固乃築堰斷大陽小溶二江以遏上流決東南隸以涸其隍破其城民聞城破卽縱火焚居室多赴水死堅及總制黃文政總管張虎俱被執因悉坑其民斬堅於市分遣萬戶托噶布哈徇賓融柳欽橫豈慶達齊榮祖徇鬱林貴廉象托里徇潯容藤梧皆下之特磨王儂士貴南丹州牧莫大秀皆奉表求內附奏官其降官乃還潭既而宋二王稱制海中雷瓊全永興潭屬縣之民文才喻等咸起兵應之舒黃蘄相繼亦起詔命討之且略地海外阿爾哈雅既定才喻

等使人諭瓊州安撫趙與珞降不聽遂航海執與珞及冉安國黃之紀皆裂殺之盡定瓊南寧萬安吉陽地降八
蕃羅甸蠻並置安撫以鎮之十八年奏請徙省鄂州所定州凡五十八峒夷山獠不可勝計大率以口舌降之未
嘗事事殺戮又其取民悉定從輕賦民所在立祠祀之二十三年入朝加湖廣行省左丞相卒封楚國公諡武定
至正八年進封江陵王子和斯哈雅湖廣行中書省左丞褒格根江西行中書省平章政事孫蘇爾約蘇哈雅自
有傳

姜衛國王蘇肯徹爾之子也性弘毅重厚喜延士大夫聽讀經史以故臨大事決大議言必中節至元十一年世
祖命總鴻吉哩等五投下兵從伐宋由正陽取安豐略廬克和攻司空山平野人原道安慶渡江東下會丞相巴
延兵于潤州分三道並進姜衛率左軍參政董文炳爲副按巴延傳言參政董文炳爲左軍宋紀言董文炳范文虎俱不及姜衛與此互異部署將校申

明約束江陰華亭澈浦上海悉望風款附進屯鹽官巴延已駐師臨安城下得宋主降表姜衛乃移兵瓜洲與阿

珠兵合臨揚州都統姜才攻楊子橋率諸將擊敗之十三年入覲授征西都元帥時親王海都叛命領汪總帥兵

以鎮西土十四年召拜江南諸道行臺御史大夫乃陳便民一十五事帝皆納焉浙東盜起浙西宣慰使錫里伯

縱兵肆掠俘及平民乃遣御史商琥閱治之釋者以數千計遂執錫里伯還治其罪十六年入覲會左丞崔斌等

言平章阿哈瑪特不法事詔命姜衛及知樞密院博囉共鞫之阿哈瑪特稱疾不出博囉欲回姜衛厲聲曰奉旨

按問敢回奏耶令輿疾赴對既引伏有旨釋免仍諭姜衛曰朕知卿不惜顏面復命還南行臺十八年左丞范文

虎參政李庭以兵十萬航海征倭遭颶風士卒十喪六七帝震怒復命行省左丞相塔爾海征之一時無敢諫者

姜衛遣使入奏謂當預修戰艦練士卒使彼聞之深自備禦遲以歲月俟其疲怠乘風疾往可一舉而下也帝遂

罷其役按日本國二十年命塔爾等募兵造舟淮四十九年又奏阿爾哈雅占降民一千八百戶爲奴阿爾哈雅宣慰使昂吉爾上言民勞乞縣兵與本備異以爲征討所得又自陳其功比巴延當賜養老戶御史滕魯瞻劾之有旨遣使赴行臺逮問姜衛曰滕御史何罪卽馳奏使者竟歸二十年以疾請入覲進譯語資治通鑑帝卽以賜東宮經筵講讀拜江淮行省左丞相二十一年卒于蠡州子阿喇卜丹南行臺御史大夫

托克托呼其先庫春居伊塔巴爾山因爲氏號其國曰欽察其地去中國三萬餘里庫春生蘇穆鼎蘇穆鼎生伊納克實世爲欽察國主太祖征默爾奇斯其主輝圖奔欽察伊納克實納之太祖命將往討國中亂伊納克實之子和拉蘇默遣使自歸於太祖憲宗帥師至和拉蘇默之子巴圖徹爾舉族迎降從征默爾奇斯有功又從世祖征大理伐宋以強勇稱嘗侍左右掌尙方馬畜托克托呼巴圖徹爾子也中統元年父子從世祖北征俱以功受上賞巴圖徹爾卒乃襲父職備宿衛至元十四年諸王托克托穆爾錫里濟叛托克托呼率兵討敗之珠爾噶岱搆亂托克托穆爾引兵應之中途遇托克托呼獲其候騎托克托穆爾乃引去遂滅珠爾噶岱追托克托穆爾等至圖喇河尋復敗之十五年大軍北征詔率欽察驍騎千人以從追錫里濟踰金山擒扎哈台等以獻又敗庫春格爾等俘獲甚衆還朝帝親慰勞之有旨欽察人爲民及隸諸王者皆別籍之以隸托克托呼選其才勇以備禁衛累遷至樞密院副使二十三年兼都指揮使聽以宗族將吏備官屬海都兵犯金山詔與大將托多爾海共禦之二十四年宗王納顏叛陰遣使來結額布根錫里哈爲托克托呼所執盡得其情以聞尋令錫里哈入朝將由東道進托克托呼言於北安王曰彼分地在東脫有不虞是縱虎入山林也乃命從西道進既有言額布根叛者衆欲先聞於朝然後發兵托克托呼曰兵貴神速卽日啟行七晝夜渡圖喇河戰于博恰嶺大敗之世祖時

親征紐顏遣使命托克托呼收其餘黨沿河而下遇叛王特爾格軍擊走之擒叛王哈喇裏等獻俘行在所誅之
時成宗以皇孫撫軍於北詔以托克托呼從追納顏餘黨於哈拉衮誅叛王烏塔噶盡降其衆二十五年諸王伊
寄哩爲叛王哈喇哈斯所攻復從皇孫移師援之敗諸烏爾呼還至哈拉衮山敗叛王哈坦盡得遼左諸部置東
路萬戶府二十六年從皇孫晉王征海都諸軍失利托克托呼直前鏖戰翼晉王而出追騎大至乃選銳設伏以
待寇不敢逼世祖巡幸北邊召見慰諭之曰昔太祖與其臣同患難者飲班珠爾河之水以紀功今日之事何愧
昔人還至京師論功行賞帝欲先欽察之士托克托呼言蒙古將吏宜先帝曰爾毋飾讓蒙古人誠居汝右力戰
豈在汝右耶二十九年略地金山獲海都之戶三千餘還至和琳有詔進取奇爾濟蘇三十年師次欠河地理志作露河
冰行數日始至其境盡收其五部之衆屯兵守之海都聞取奇爾濟蘇引兵至欠河復敗之二年諸王附海都者
率衆來歸邊民驚擾身至伊嚕哈斯界饋餉安集之導諸王永和爾等入朝大德元年拜同知樞密院事欽察親
軍都指揮使奉命還北邊至宣德府卒追封延國公諡武毅後加封昇王子八人其第三子曰綽和爾

綽和爾初以大臣子奉詔從太師阿爾裏行軍戰于布達山有功拜左衛親軍都指揮使大德元年襲父職領征
北諸軍帥師踰金山攻巴林之地敗其將達蘭台於達嚕噶河追奔五十里還次達嚕噶河與海都所遣援巴林
之將博貝軍遇又擊敗之二年北邊諸王都勒幹齊齊克圖等襲和囉噶圖之地兵據高山綽和爾選勇而善步
者持挺刃四面上奮擊盡覆其軍三年入朝拜僉樞密院事欽察親軍都指揮使太僕少卿復還邊是時武宗在
潛邸領軍朔方軍事必諮於綽和爾及戰嘗爲先四年叛王圖們俄羅斯等犯邊綽和爾及其未陣薄之敵遁追
之踰金山乃還五年海都兵越金山而南止於特濟根山因高以自保綽和爾急引兵敗之復與都勒幹相持于

烏爾圖之地以精銳馳其陣左右奮擊都勒幹兵幾盡事聞詔問戰勝功狀咸稱綽和爾功第一七年入朝帝嘉
獎之拜樞密院副使九年諸王都勒幹徹伯爾莽賚特穆爾等因與托克托呼及綽和爾屢戰無功遣使請罷兵
通好帝許之於是罷兵入朝特爲置驛以通往來十年知樞密院事成宗崩武宗時在袞穆蘇之海上綽和爾請
急歸定大業武宗納其言卽日南還及卽位加拜平章政事還邊復封榮國公至大二年入朝加封句容郡王繼
和爾加封句容郡王武宗紀至大三年仁宗紀延祐元年敗叛王額森布哈等軍于伊特格庫默色之地二年
繼三年並載此事本傳作至大二年未知孰是
復敗其將額布根呼圖克特穆爾于齊默根之地追至鐵門關遇其大軍又敗之四年帝念其功而憫其老召入
商議中書省事待以宗室親王之禮至治二年卒後累封揚王子大人雅克特穆爾自有傳

欽定續通志卷四百六十八

列傳

元二十二

來阿巴齊

耨塔

伊蘇伯爾

阿噶罕

安塔哈

索多

伯嘉努

李恆

來阿巴齊寬人父濟蘇和爾歸太祖選居宿衛繼掌膳事憲宗卽位大舉伐宋攻釣魚山濟蘇和爾建言請城重慶合州二城之間命將守之與成都舊兵相出入不時擾之以牽制其援師然後水陸東下破忠涪萬夔諸小郡出三峽下荆楚與鄂州渡江諸軍合勢則東南一舉可定諸將以其言爲迂卒不用于是博選宿衛中材力可任用者以阿巴齊奉命往監元帥耨塔軍遏宋人援兵駐重慶下之銅羅峽宋都統甘順沔流西上乘舟來攻阿巴齊順流而進宋人力戰不能支退保西岸明日復至阿巴齊率精兵緣崖而下宋人敗走殺傷數千人帝聞而壯之憲宗崩阿巴齊從其父僧道歸燕世祖卽位問以川蜀之事阿巴齊歷陳始末誦其父前所言以對世祖撫掌曰當時若從東南其足平乎朕在鄂渚日望上流之聲勢耳至元七年南征襄樊發河南北器械糧儲命阿巴齊督運二日而畢十八年授益都等路宣慰使都元帥發兵開運河阿巴齊往來督視寒暑不輟河既開遷膠萊海道漕運使二十一年遼左不寧授征東招討使阿巴齊招徠附遠近帖然二十二年皇子鎮南王征交趾授湖廣等處行中書省右丞二十四年改湖廣等處行尚書省右丞詔四省按安南國傳四省江淮江西湖廣及雲南所發士馬俾阿巴齊閱視領中衛親軍千人翊導皇子至思明州賊阻險拒守于是選精銳戰於女兒關斬馘萬計進至交州陳日烜空其城而遁屢遣使約降欲以緩我師諸將皆信其說久之軍乏食日烜不降擁衆據竹洞安邦海口阿巴齊

率兵往攻之賊兵敗遁會將士多疫不能進而諸蠻復叛所得關隘皆失守乃議班師選諸軍步騎命先啟行且戰且行賊據高險射毒矢將士裹創以戰諸蠻皇子出賊境阿巴齊中毒矢遂卒子吉遜平黎蠻有功官雷州路總管

耨埒沙卜珠岱人祖博囉岱爲太祖宿衛從太宗平金戍河南父丹達爾佐憲宗征阿蘇欽察等國有功拜都元帥歲壬子率陝西青海鞏昌諸軍攻宋入蜀癸丑與總帥汪特格立利州甲寅攻碣門黎雅等城乙卯入重慶獲都統制張實是歲卒耨埒偉貌長身勇力絕人且多謀略常從父軍中丁巳憲宗命將兵萬人略地自利州下白水直抵夔門戊午還釣魚山引軍欲會都元帥阿多古等於成都宋制置使蒲擇之遣安撫劉整都統制段元鑑等率衆據遂寧江箭灘渡以斷東路耨埒軍至與戰斬首二千餘級遂長驅至成都蒲擇之命楊大淵等守劍門及靈泉山自將兵取成都會阿多古死諸王額布根與諸將托里台等推耨埒爲長耨埒率諸將大破宋軍于靈泉山蒲擇之兵潰進圍雲頂山城扼宋軍歸路其主將倉卒失計遂以其衆降城中食盡亦殺其守將以降成都彭漢懷綿等州悉平威茂諸蕃亦來附捷聞卽軍中眞拜都元帥冬帝進軍至大獲山耨埒發成都遣張威爲前鋒水陸並進謀鎖重慶江以絕吳蜀之路縛橋資州之口以濟師千戶溫都爾率舟師而下耨埒將步騎而南鼓譟渡瀘放舟而東蒲擇之以兵分道要遮遇輒敗之耨埒至涪造浮橋駐軍橋南北以杜宋援兵明年朝行在所還討思播二州宋將呂文煥攻涪浮橋時士馬不耐水土多病死有旨督戰不得已出師大敗文煥軍遂班師文煥以兵襲其後耨埒戰却之中統元年耨埒遣梁載立招降黎雅調門巖州偏林關諸蠻得漢蕃二萬餘戶未幾招蘇克分西川兵及陝西諸軍屬耨埒鎮秦鞏唐古之地三年宋將劉整以瀘州降呂文煥圍之詔以兵往援文

煥敗走遂徙瀘州民於成都潼川四年爲劉整所譖徵至上都驗問無狀詔釋之還至昌平卒子伊蘇岱爾

伊蘇岱爾勇智類其父至元十一年入見世祖以屬行樞密院和塔齊使習兵事從圍嘉定以三千人至三龜九

頂山相地形勢敗宋安撫皆萬壽兵以功授六翼達噶齊既而嘉定三龜九頂紫雲諸城皆降從行樞密副使

呼敦率兵徇下流諸城皆望風來附呼敦會東川行樞密院哈達圍重慶歲餘不下帝命副使布哈代將布哈將

兵至城下伊蘇岱爾率二十餘騎攻其門宋都統趙安出戰伊蘇岱爾三入其軍再挾猛士以出大兵四集斬首

五百餘級趙安開門降制置使張珪遁追至涪州擒之捷聞授四川西道宣慰使加都元帥羅氏鬼國亦奚不薛

叛詔以四川兵會雲南江南兵討之亦奚不薛遣先鋒阿麻阿豆等迎敵伊蘇岱爾馳入其軍斬之亦奚不薛懼

率所部降按經世大典載至元十六年羅氏國主阿察叛十七年討之阿察遣阿憐阿麻至宣慰司自言無反意伊蘇岱爾等分兵三道攻會監關亦奚不薛遣其部阿侯拒戰敗逃入山晉亦奚不薛及阿察俱遁伊

蘇岱爾定議班師命將守之賊窮以功拜西川等處行中書省右丞西南夷雄左都掌蠻得蘭右叛詔以兵討降

之改四川等處行樞密副使烏蒙蠻陰連都掌蠻以叛詔以兵會雲南行院拜達勒進討伊蘇岱爾擒烏蒙蠻進

同知四川等處行樞密院事成宗卽位拜四川等處行中書省平章政事武宗時由四川遷雲南加左丞相南征

叛蠻感瘴毒還至成都卒長子囊嘉特官至四川行省平章政事孫達實巴圖爾自有傳

阿噶罕扎拉爾氏祖傳緯氏太祖爲博囉齊數有戰功太祖卽位從征隴北陝西身先戰士死焉父伊塔肯從皇

子庫春南征累功拜諸翼軍馬都元帥統大軍攻淮東西諸郡戊午戰死揚州阿噶罕襲爲諸翼蒙古軍馬都元

帥已未從世祖渡江至鄂而還世祖卽位宗王額塔布格稱兵內向阿噶罕以所部軍擊破之中統三年李壇叛

阿噶罕敗之於老倉口壇伏誅授都元帥至元四年從阿珠伐宋師次安陽灘逆戰宋兵敗之五年大軍圍襄樊

阿嚙罕守百丈山漫河灘兵累交宋不能師十年樊城破襄陽降十一年丞相巴延與阿珠會師襄陽遣阿嚙罕率諸翼軍攻郢復諸州奪郢州南門堡巴延阿珠欲取漢口渡江宋人以精兵扼漢口乃遣阿嚙罕擊沙蕪堡遂入江取鄂州阿嚙罕略壽昌順流東下沿江州郡悉降十二年屯駐建康巴延受詔赴關以阿嚙罕留治省事拜參知政事巴延還分軍三道並進阿嚙罕由西道趨溧陽攻破銀樹東壩至護牙山慶豐圩連敗宋軍破建平縣進攻廣德軍獨松關宋廣德守張濡率兵來拒戰敗追斬之十三年宋以國降詔阿嚙罕同左丞董文炳率高興等攻浙東溫台衢婺處明越及閩中諸郡降其運使提刑等五百人追襲宋嗣秀王趙與擇至安福縣按安福縣宋史作瑞

安考宋二王紀景炎間升福州爲福安府溫州爲瑞安府元地理志福州路有福安縣然則安福誤也與擇宋史作與舉

與擇以軍三萬拒戰阿嚙罕渡江鏖戰斬其步帥觀

察使李世達生擒與擇及其將吏百八十人悉斬之泉州蒲壽庚降江南平以參知政事行江東宣慰使十四年入覲進行中書省左丞俄遷右丞仍宣慰江東十八年召拜中書左丞行中書省事統蒙古軍四十萬征日本行次慶元卒于軍子貝降襲貝降卒弟伊蘇岱爾襲

安塔哈痕都斯坦人祖塔爾海巴圖爾驍勇善戰嘗從太祖同飲黑河水以功爲千戶父布哈襲職卒安塔哈襲千戶從大帥烏蘭哈達征雲南身先行陣師還事世祖于潛邸至元九年命馳驛督諸軍攻襄陽十年襄陽下第功授鎮國上將軍淮西行樞密院副使十一年築正陽東西城宋將夏貴乘淮水溢來爭正陽安塔哈率衆禦之貴走追至安豐城下而還拜中書右丞行樞密院事十二年渡江與丞相巴延軍合克池州師次建康宋鎮江攝守石祖忠遣使乞降揚州守將李庭芝聞之遣兵突圍出擊安塔哈救之宋兵退走時真泰諸城尙爲宋守鎮江城壁不固安塔哈乃立木橈以保居民又分兵屯瓜洲以絕揚州之援宋將張世傑孫虎臣帥舟師陳于江中焦

山下其勢甚張安塔哈與平章阿珠督諸軍破之宋殿帥張彥與平江都統劉師勇襲呂城遣萬戶輝圖擊之斬
彥克常州降平江嘉興十三年

按原傳降平江嘉興以前諸事統叙于至元九年之下間以宋降為十二年事與本紀及巴延阿珠等傳俱不合謹按年次改正

會兵臨安降詔

與阿珠議淮南事宜淮南平授平章政事行中書省事十五年召赴闕拜行中書省左丞相移治臨安二十年遷
征東行省丞相征日本遇風舟壞喪師二十二年行同知沿江樞密院事二十三年行江西中書省事入朝二十
四年扈從征納顏師還奉朝請居京師二十六年卒追封順昌郡王諡武敏子阿里瑪累官江南諸道行御史臺
御史大夫

索多扎拉爾氏驍勇善戰入宿衛從征花馬國有功李璫叛從諸王哈必齊平之還言於朝曰郡縣惡少年多從
間道鬻馬于宋境乞免其罪籍為兵從之得兵三千人以千人隸索多為千戶命守蔡州至元五年阿珠等圍襄
陽命索多巡邏奪宋金剛寨寨酋基窩青澗寨大洪山歸州洞諸隘嘗猝遇宋兵千餘持羈勒欲竊馬索多戰敗
之六年宋將范文虎率舟師駐鱸子灘丞相史天澤命索多拒却之陞總管九年攻樊城索多先登城遂破襄陽
降陞郢復等處招討使十一年移戍郢州之高港敗宋師從大軍濟江鄂漢降十二年建康降參政達春命索多
入城招集改建康安撫使攻平江嘉興皆下之十三年

按巴延傳巴延駐軍奉山乃十三
年事此傳統叙於十二年內今據增

舟師會巴延于旱亭

山宋平詔巴延以宋主入朝留參政董文炳守臨安以索多副之時衛懿諸州皆復起兵文炳使索多鎮嚴州衢
婺徽連兵來攻索多戰却之復婺州敗宋將陳路鈴于梅嶺之下又復龍游縣攻衢州拔之宋丞相留夢炎降攻
處州及建寧府松溪懷安等縣皆下之十四年陞福建道宣慰使行征南元帥府事參政達春令取道泉州泛海
會于廣州之富場將行信州守臣來求援曰今邵武方聚兵觀釁元帥旦往邵武兵夕至矣索多乃遣周萬戶等

往招降之案多趨建寧遇宋兵于崇安擊敗之宋丞相文天祥南劍州都督張清合兵將襲建寧案多夜設伏敗之轉戰至南劍敗張清奪其城至福州王積翁以城降攻興化軍破其城巷戰終日獲知軍陳瓚支解以徇至漳州先遣其子伯嘉努往會達春留攻之知府何清降攻潮州知府馬發不降案多恐失富場之期乃舍之而去十五年至廣州達春令還攻潮發城守益備二十餘日不能下案多令於衆曰有能先登者拜爵已官者增秩總管烏蘭噶爾先登諸將繼之宋兵潰潮州平進參知政事行省福州入見帝陞左丞行省泉州十八年改右丞行省占城十九年率戰船浮海伐占城占城迎戰斬溺五萬餘人又敗之于大浪湖占城降復伐烏里越里諸小夷皆下之積穀十五萬以給軍二十一年鎮南王托歡征交趾詔案多帥師來會敗交趾兵于清化府奪義安關托歡命案多屯天長以就食與大營相距二百餘里二十二年有旨班師托歡引兵還案多不知也交趾使人告之弗信及至大營則空矣交趾遮之于乾滿江力戰死事聞諭襄愍子伯嘉努

伯嘉努至元五年從元帥阿珠攻襄陽築新城數立功七年以質子從郡王哈達敗宋兵于鱸子灘八年宋殿帥范文虎等督促糧道輸之襄陽伯嘉努順流出擊累獲戰功於是河南行省命爲管軍總把後隸丞相巴延麾下擢爲知印十一年

按巴延傳伯嘉努從攻鄂州破金牛壩增從攻鄂州深入却敵身被數創攻沙洋及新城登城力戰拔

牛壩事皆在至元十一年今據增從攻鄂州深入却敵身被數創攻沙洋及新城登城力戰拔

之巴延以功上聞世祖大悅從圖漢陽自沙燕口

原作沙武口今據巴延及阿爾哈雅傳收歸靈一

曳船入江宋制置夏貴來迎戰伯嘉

努突入壘之宋兵潰遂登江南岸獲其戰船器甲甚多未幾復攻破金牛壩十二年取雞籠洞還遂至瑞昌縣遇夏貴潰兵復擊敗之是時宗遣兵救瑞昌未至而縣已下矣圖江州宋安撫呂師夔以城降東定池州擊宋平章賈似道及孫虎臣于丁家洲追逐百餘里擒宋統制王文虎因定黃池略地宣州伯嘉努爲前鋒敗敵兵于喃呢

湖于是太平州望風款附攻丹陽呂城破常州皆有功至蘇州宋守臣王安撫以城降秀州湖州皆不煩兵而下諸軍乘勝趨臨安宋主出降十三年領新附軍守鎮江未幾復從平章博囉罕攻秦壽二州中創遂攻後數日攻泰州新城力疾先登破之復被兩創已而從阿珠攻下揚州諸郡得宋制置李庭芝都統姜才以功陞管軍總管鎮高郵白馬湖徇地福建定衢婺信等州至新安擊斬宋趙監軍詹知縣擒江通判鼓行而東沈安撫以建寧府降攻陷南劍州張清聶文慶遁去閩清懷安二縣傳檄而定至福州諭以威德王安撫率衆出降攻破興化擒陳安撫及白牒都統別擊東華鄉張世傑軍于泉州俄領諸軍乘戰船入海追逐張世傑于甲子門進至答關寨瀕海縣鎮悉招諭下之白望丹王虎陳以戰船三千餘艘來降宋二王遣倪宙奉表詣軍門降遂進兵至廣州諸郡縣以次降附明年春振旅還復攻下德勝等寨至蒲仙江聶文慶復敗走攻潮州破之誅馬發等數人廣東遂平引宙奉降表來朝未至授管軍萬戶七月朝于上都陞海外諸蕃宣慰使兼福建道長司宣慰使都元帥是時福建多水災伯嘉努出私錢市米以振貧民全活者甚衆二十二年從父索多征交趾索多戰死伯嘉努遂與托歡引兵薄交趾境水陸轉戰戰輒有功二十七年除建康路總管武宗卽位遷鎮江路總管至大四年金瘡發卒于家

李恆字德卿其先姓於彌氏唐末賜姓李世爲西夏國主太祖經略河西有守烏訥爾城者夏主子也城陷不屈死子惟忠方七歲求從父死主將異之報以獻宗王哈扎爾王留養之及嗣王伊遜克立惟忠從經略中原有功以爲達嚕噶齊惟忠生恆恆生有異質王妃撫之猶己子中統三年命恆爲尙書斷事官恆以讓其兄李璫反璫海恆從其父棄家入告璫璫怒繫恆闔門獄中璫誅得出世祖嘉其功授淄萊路鄂囉總管至元七年改益都淄

萊新軍萬戶從伐宋襄陽守將呂文煥時出拒敵嚴帥范文虎復援之恆築堡萬山絕其陸路文煥等又以漁舟渡漢水窺伺軍形恆設伏敗之水路亦絕遂進攻樊城十年恆以精兵渡漢自南面先登樊城破襄陽亦降十一年丞相巴延會師襄陽進至鄂州宋以舟師截漢水巴延捨鄂進攻沙洋新城留恆爲後拒敗其追兵至陽羅堡宋制置夏貴遣其子松來逆戰恆先陷陳陂中流矢戰益力卒射松殺之夏貴敗走鄂州漢陽俱下遂從巴延東下十二年宋將高世傑復窺漢沔乃遣恆還守鄂州時豪民聚衆侵江陵命恆討之恆諭使降得生口十餘萬悉縱爲民仍禁軍毋得虜掠十三年從右丞阿爾哈雅至洞庭生擒世傑下岳州進攻沙市拔之宋制置高達以江陵降留恆鎮守傳檄歸峽辰沅靖潭常德諸州皆下未幾徙鎮常德以扼湖南之衝俄有詔分三道出師以恆爲左副都元帥從都元帥蘇都爾台出江西開府江州師次建昌縣擒都統熊飛按宋紀云飛率兵巷戰敗逃水死與此互異遂圍隆興轉運使劉繫請降恆察其詐密爲之備繫果以銳兵突至恆擊敗之下撫瑞建昌臨江進攻吉州知州周天驥降遂定贛南安廣東經略徐直諒奉蠟書納其所部十四郡前江西制置黃萬石亦以邵武降隆興帥府誣富民與敵通已誅百三十家恆還審其非罪盡釋之宋丞相陳宜中及其大將張世傑立益王是於閩中郡縣豪傑爭起兵應之恆遣將破吳淞兵於南豐世傑遣都統張文虎與淞合兵十萬期必復建昌恆復遣將敗之淞走從文天祥於瑞金又破之天祥走汀州遣鎮撫孔遵追之併破趙孟潛軍取汀州遷江西宣慰使天祥復取汀州兵出興國縣連破諸邑圍贛州尤急或請發天祥祖父墳墓恆不許乃分兵援贛自率精兵潛至興國天祥走追至空坑擒招討使趙時賞降其衆二十萬有旨令與右丞阿里哈左丞董文炳合兵追益王衆謂宜趨福建恆曰若諸軍俱在福建彼必竄廣東則梅嶺江西非我有矣宜從廣東夾攻之衆以爲然兵至梅嶺果與宋兵遇敗之乃遁走